

石門文字禪

卷第二十七

宋江西筠溪石門寺沙門釋德洪覺範 著

門人覺慈 編錄

毘陵天甯法雲堂 校

跋東坡「怡台允」池 錄

歐陽文忠公以文章宗一世，讀其書，其病在理不通。

以理不通故，心多不能平。以是後世之卓絕穎脫而出者，皆目笑之。東坡蓋五祖戒禪師之後身，以其理通，故其文渙然如水之質，漫衍浩蕩，則其波亦自然而成文。蓋非語言文字也，皆理故也，自非從般若中來，其何以臻此！其文自孟軻、左丘明、太史公而來，一人而已。

然予有恨，恨其窺夢幻如霧見月。雖老而死，古今聖達所不免，譬如晝則有夜，而東坡喜學煉形蟬蛻之道，期白日而骨飛，竟以病而歿。使其如魯仲連之不受萬鍾之位而肆志，則寧復有遺恨哉！

佛鑑能珍敬其書，則其趣味，乃真是山邊水邊之人，與夫假高尚之名，心悅孔方道人者異矣。

【經文資訊】嘉興藏第 23 冊 No. B135 石門文字禪

東坡禪喜集（卷之八）

日本 森大狂 校訂

○禪喜紀事第八

蘇子由謫高安，雲庵時時相過。有聰禪師，亦蜀人。

一夕雲庵夢同子由、聰迓五祖戒禪師。既覺，語子由，而聰亦至。子由曰：「方與洞山說夢。子今來，同說夢乎。」聰曰：「夜來夢吾三人迎戒和尚。」子由曰：「世間果有同夢者！」

久之，東坡書至，曰：「已至奉新，旦夕相見。」三人喜出城，而坡至，則以語坡。坡曰：「軾七八歲，常夢是僧。又先妣方孕時，夢一僧來托宿。」

及謫英州，雲居佛印遣書至南昌。坡引紙大書曰：「戒和尚又錯脫也。」

後監玉局觀，作偈答南華長老曰：「惡業相纏四十年，常（常一作當）行八棒〔棒〕十三禪。卻著衲衣歸玉局，自疑身是五通仙。」（冷齋夜話）

【經文資訊】大藏經補編第 26 冊 No. 0148 東坡禪喜集